

08 AUG 2001

AGONG UCAP TAHNIAH KEPADA PRESIDEN SINGAPURA

KUALA LUMPUR, 8 Ogos (Bernama) -- Yang di-Pertuan Agong Sultan Salahuddin Abdul Aziz Shah telah mengutuskan ucapan tahniah kepada Presiden Selliapan Ramanathan dan rakyat Singapura sempena sambutan Hari Kebangsaan republik itu.

Seri Paduka berharap hubungan persahabatan antara kedua-dua negara akan terus dimajukan dan dikembangkan bagi faedah bersama rakyat.

Menurut kenyataan Wisma Putra hari ini, Perdana Menteri Datuk Seri Dr Mahathir Mohamad juga mengirinkan ucapan yang serupa kepada Perdana Menteri Singapura Goh Chok Tong.

Dr Mahathir melahirkan kegembiraannya mendapati hubungan dua hala antara Malaysia dan Singapura berkembang dengan begitu baik sekali.

"Saya percaya hubungan baik dan mesra antara kedua-dua negara telah memberi sumbangan besar kepada pembangunan negara masing-masing serta kesejahteraan dan kemajuan rakyat serta rantau ini keseluruhannya," katanya.

Menteri Luar Datuk Seri Syed Hamid Albar, dalam ucapan tahniahnya kepada rakan sejawatannya di Singapura Prof S. Jayakumar berkata hubungan dua hala telah berkembang dengan baik sejak bertahun-tahun dahulu untuk faedah bersama.

"Kerjasama dua hala yang semakin diperkukuh ini akan memudahkan lagi usaha memajukan negara dan rakyat," katanya.

-- BERNAMA

HS HS NMO